

**"Қазақстан Республикасы Президентінің "Алтын сапа" сыйлығын алуға арналған конкурс және "Қазақстанның үздік тауары" республикалық көрме-конкурсы туралы" Қазақстан Республикасы Президентінің 2006 жылғы 9 қазандағы № 194 Жарлығына өзгерістер мен толықтырулар енгізу туралы" Қазақстан Республикасының Президенті Жарлығының жобасы туралы**

Қазақстан Республикасы Үкіметінің 2017 жылғы 25 тамыздағы № 508 қаулысы

Қазақстан Республикасының Үкіметі **ҚАУЛЫ ЕТЕДІ:**

"Қазақстан Республикасы Президентінің "Алтын сапа" сыйлығын алуға арналған конкурс және "Қазақстанның үздік тауары" республикалық көрме-конкурсы туралы" Қазақстан Республикасы Президентінің 2006 жылғы 9 қазандағы № 194 Жарлығына өзгерістер мен толықтырулар енгізу туралы" Қазақстан Республикасының Президенті Жарлығының жобасы Қазақстан Республикасы Президентінің қарауына енгізілсін.

*Қазақстан Республикасының  
Премьер-Министрі*

*Б. Сағынтаев*

**"Қазақстан Республикасы Президентінің "Алтын сапа" сыйлығын алуға арналған конкурс және "Қазақстанның үздік тауары" республикалық көрме-конкурсы туралы" Қазақстан Республикасы Президентінің 2006 жылғы 9 қазандағы № 194 Жарлығына өзгерістер мен толықтырулар енгізу туралы**

**ҚАУЛЫ ЕТЕМІН:**

1. "Қазақстан Республикасы Президентінің "Алтын сапа" сыйлығын алуға арналған конкурс және "Қазақстанның үздік тауары" республикалық көрме-конкурсы туралы" Қазақстан Республикасы Президентінің 2006 жылғы 9 қазандағы № 194 Жарлығына (Қазақстан Республикасының ПҰАЖ-ы, 2006 ж., № 38, 418-құжат; 2007 ж., № 24, 267-құжат; № 42, 476-құжат; 2008 ж., № 42, 464-құжат; 2009 ж., № 33, 307-құжат; 2010 ж., № 39, 335-құжат; 2012 ж., № 10, 189-құжат; № 36, 476-құжат; 2013 ж., № 22, 351-құжат; 2014 ж., № 4, 29-құжат; № 32, 282-құжат; № 75, 666-құжат) мынадай өзгерістер мен толықтырулар енгізілсін:

жоғарыда аталған Жарлықпен құрылған Қазақстан Республикасы Президентінің "Алтын сапа" сыйлығының лауреаты атағын және "Қазақстанның үздік тауары" республикалық көрме-конкурсының дипломанты атағын беру жөніндегі комиссияның құрамында:

"Қазақстан Республикасының тауар өндірушілері мен экспорттаушылар одағы" республикалық заңды тұлғалар бірлестігінің төрағасы" (келісім бойынша)" деген жол мынадай редакцияда жазылсын:

"Қазақстан Республикасының тауар өндірушілері мен экспорттаушылар одағы" республикалық заңды тұлғалар бірлестігінің вице-президенті" (келісім бойынша)";

"Қазақстан тағам және қайта өңдеу өнеркәсібінің тауар өндірушілер одағы" заңды тұлғалар бірлестігінің президенті (келісім бойынша)" деген жол мынадай редакцияда жазылсын:

"Қазақстанның тағам кәсіпорындары одағы" заңды тұлғалар бірлестігінің президенті (келісім бойынша)";

"Тұтынушылардың ұлттық лигасы" республикалық қоғамдық бірлестігінің президенті (келісім бойынша)" деген жолдан кейін мынадай мазмұндағы жолдармен толықтырылсын:

"Қазақстан құс шаруашылығы одағы" заңды тұлғалар бірлестігінің президенті (келісім бойынша)

"Қазақстанның картоп өсірушілері мен көкөніс өсірушілері қауымдастығы" заңды тұлғалар бірлестігінің төрағасы (келісім бойынша)";

жоғарыда аталған Жарлықпен бекітілген Қазақстан Республикасы Президентінің "Алтын сапа" сыйлығын алуға арналған конкурс өткізу және лауреат атағын беру ережелері осы Жарлыққа 1-қосымшаға сәйкес жаңа редакцияда жазылсын;

жоғарыда аталған Жарлықпен бекітілген "Қазақстанның үздік тауары" республикалық көрме-конкурсын өткізу және дипломант атағын беру ережелері осы Жарлыққа 2-қосымшаға сәйкес жаңа редакцияда жазылсын;

жоғарыда аталған Жарлықпен бекітілген Қазақстан Республикасы Президентінің "Алтын сапа" сыйлығының лауреаты атағын және "Қазақстанның үздік тауары" республикалық көрме-конкурсының дипломанты атағын беру жөніндегі комиссия туралы ережеде:

8-тармақ мынадай мазмұндағы 7), 8) және 9) тармақшалармен толықтырылсын:

"7) әлеуетті қатысушылар үшін конкурстар өлшемшарттары бойынша оқыту семинарларын және вебинарларын өткізу арқылы оқытуды ұйымдастыру;

8) сарапшылар тізілімін жүргізу;

9) конкурстарды ақпараттық сүйемелдеу, әлеуметтік желілерде сапа идеясын дәріптеу, ақпаратты жылжыту.";

12-тармақ мынадай редакцияда жазылсын:

"12. Конкурстардың жеңімпаздарына конкурстардың эмблемаларын және дипломдарын беру салтанатты жағдайда жүзеге асырылады. Конкурс жеңімпаздарына конкурстардың эмблемаларын және дипломдарын тапсыру күні және орны Қазақстан Республикасы Президентінің Әкімшілігімен келісім бойынша айқындалады.

Конкурстық материалдарда қамтылған және жергілікті жерлерде сараптама барысында алынған ақпарат құпия болып табылады және оны жазбаша келісімсіз, конкурсқа қатысушыны бағалаудан басқа, өзге де мақсаттарда пайдаланылмайды."

2. Қазақстан Республикасының Үкіметі осы Жарлықты іске асыру бойынша шаралар қабылдасын.

3. Осы Жарлық 2018 жылғы 1 қаңтардан бастап қолданысқа енгізіледі және ресми жариялануға тиіс.

Қазақстан Республикасының  
Президенті

Н.Назарбаев

Астана, Ақорда, 2017 жыл №

Қазақстан Республикасы  
Президентінің  
2017 жылғы  
№ Жарлығына  
1-қосымша

Қазақстан Республикасы  
Президентінің  
2006 жылғы 9 қазандағы  
№ 194 Жарлығымен  
бекітілген

## **Қазақстан Республикасы Президентінің "Алтын сапа" сыйлығын алуға арналған конкурстың өткізу және лауреат атағын беру ережесі**

1. Қазақстан Республикасы Президентінің "Алтын сапа" сыйлығы (бұдан әрі – сыйлық) ұйымның өнімінің және/немесе көрсетілетін қызметтердің сапасы, олардың қауіпсіздігін қамтамасыз ету саласында елеулі нәтижелерге қол жеткізгені үшін, сондай-ақ ұйымның сапаны басқарудың тиімділігі жоғары әдістерін енгізгені үшін конкурстың негізінде жыл сайын беріледі.

Сыйлық лауреат атағына ие болған конкурстың қатысушыларға сыйлықты, конкурстың эмблемасын, лауреаттар дипломдарын және ақшалай сыйақыны беруді көздейді.

Ақшалай сыйақы мөлшері 450 (төрт жүз елу) айлық есептік көрсеткішті құрайды.

2. Қазақстан Республикасы Президентінің "Алтын сапа" сыйлығының лауреаты атағын және "Қазақстанның үздік тауары" республикалық көрме-конкурсының дипломанты атағын беру жөніндегі комиссия (бұдан әрі – Комиссия) осы Ережелердің 5-тармағында көзделген төрт номинациядағы үш санат бойынша жыл сайын сыйлықтар береді.

Сыйлық лауреаты атағы Қазақстан Республикасы Президентінің "Алтын сапа" сыйлығын алуға арналған конкурстың (бұдан әрі – конкурс) жеңімпаздарына Комиссия шешімінің негізінде беріледі.

3. Сыйлық алуға арналған конкурсты ұйымдастыру тиісті қаржы жылына арналған республикалық бюджетте осы мақсаттарға көзделген қаражат есебінен және оның шегінде жүзеге асырылады.

4. Сыйлық алуға Қазақстан Республикасының аумағында тауарлар өндірумен (қару-жарақ пен әскери техника өндіруді қоспағанда), қызметтер көрсетумен айналысатын жеке кәсіпкерлер мен заңды тұлғалар (бұдан әрі – конкурсқа қатысушылар) үміткер бола алады.

Мемлекеттің қатысу үлесі 50 %-дан асатын ұйымдар, сондай-ақ өздеріне қатысты белгіленген тәртіппен оңалту және банкроттық туралы Қазақстан Республикасының заңнамасында көзделген рәсімдерді жүзеге асыру туралы шешімдер қабылданған ұйымдар конкурсқа қатысуға жіберілмейді.

Қазақстан Республикасының әкімшілік құқық бұзушылық туралы заңнамасында көзделген құқық бұзушылықтары бар ұйымдарға Қазақстан Республикасы Президентінің "Алтын сапа" сыйлығы лауреаты атағын беруге жол берілмейді.

5. Конкурсқа қатысушылар Комиссияға кемінде үш жыл ішінде шығарылатын өнімнің немесе көрсетілетін қызметтің жоғары сапасын растауға тиіс.

Ұйымдар конкурсқа мынадай:

- 1) "Өндірістік мақсаттағы үздік кәсіпорын";
- 2) "Халық тұтынатын тауарларды шығаратын үздік кәсіпорын";
- 3) "Қызметтер көрсететін үздік кәсіпорын";

4) "Азық-түлік тауарларын және/немесе ауыл шаруашылық өнімдерін өндіретін үздік кәсіпорын" номинациялары бойынша қатысады.

Әр номинация бойынша мынадай:

- 1) шағын кәсіпкерлік субъектісі;
- 2) орта кәсіпкерлік субъектісі;
- 3) ірі кәсіпкерлік субъектісі санаттары бойынша үш сыйлық беріледі.

Конкурста "Үздік индустриялық жоба", "Үздік инновациялық жоба" арнайы сыйлықтары тағайындалады.

6. Қазақстан Республикасының Ұлттық кәсіпкерлер палатасы сыйлық алуға арналған конкурсты ұйымдастырушы (бұдан әрі – конкурсты ұйымдастырушы) болып табылады.

7. Сыйлықты алуға оны белгілі бір номинацияда алғаннан кейін төрт жыл бойы қайта ұсынуға жол берілмейді.

8. Конкурсты ұйымдастырушы жыл сайын ағымдағы жылдың ақпан айында осы конкурсты өткізу туралы бұқаралық ақпарат құралдарында хабарлайды.

9. Конкурсқа қатысуға ниет білдірген конкурсқа қатысушылар Қазақстан Республикасының Үкіметі бекіткен Қазақстан Республикасы Президентінің "Алтын сапа" сыйлығын алуға арналған конкурсқа қатысушылардың материалдарын ресімдеу, ұсыну және алдын ала бағалау ережелеріне сәйкес материалдарды ресімдейді және конкурсты ұйымдастырушыға береді.

10. Конкурс төрт кезеңмен өткізіледі:

1) бірінші кезеңде конкурсты ұйымдастырушы конкурсқа қатысуға өтініштер қабылдау және материалдарды алдын ала бағалауды жүзеге асырады;

2) екінші кезеңде конкурсты ұйымдастырушы конкурсқа қатысушылардың материалдарын және осы материалдарға алдын ала қорытындыны Комиссияның қарауына ұсынады. Комиссия конкурстың үшінші кезеңіне қатысуы үшін конкурс финалистерін (әр номинацияда үштен артық емес) анықтайды;

3) үшінші кезеңде кәсіпорындарға барып финалистерді бағалау жүргізіледі;

4) төртінші кезеңде конкурсты ұйымдастырушы әр номинацияда үш финалистен жергілікті жерде өткізілген материалдарды сарапшылық бағалау және сараптама нәтижелерімен бірге конкурс финалистерінің материалдарын Комиссияның қарауына ұсынады.

Комиссия ұсынылған материалдардың негізінде конкурсқа қатысушыларға сыйлық лауреаттары атақтарын беру туралы шешім қабылдайды.

11. Сыйлық лауреаты атағына ие болған конкурсқа қатысушыларға тиісті диплом, конкурстың эмблемасы және ақшалай сыйақы табыс етіледі.

12. Конкурс жеңімпаздарын марапаттау рәсімі жыл сайын салтанатты түрде өткізіледі. Конкурс жеңімпаздарын марапаттау рәсімін өткізу күні мен орны Қазақстан Республикасы Президенті Әкімшілігімен келісу бойынша анықталады.

13. Сыйлық лауреаты атағына ие болған конкурсқа қатысушылардың тізімі бұқаралық ақпарат құралдарында жарияланады.

14. Сыйлық лауреаты атағына ие болған конкурсқа қатысушылар сыйлық берілгеннен кейін төрт жыл бойы сыйлық эмблемасын жарнамалық мақсатта пайдалану құқығына ие болады.

Қазақстан Республикасы  
Президентінің  
2017 жылғы  
№ Жарлығына  
2-қосымша

Қазақстан Республикасы  
Президентінің  
2006 жылғы 9 қазандағы  
№ 194 Жарлығымен  
бекітілген

## **"Қазақстанның үздік тауары" республикалық көрме-конкурсын өткізу және дипломант атағын беру ережелері**

1. Қазақстан Республикасының Ұлттық кәсіпкерлер палатасы "Қазақстанның үздік тауары" республикалық көрме-конкурсын (бұдан әрі – конкурс) ұйымдастырушы (бұдан әрі – конкурсты ұйымдастырушы) болып табылады, облыстардың,

республикалық маңызы бар қаланың және астананың кәсіпкерлер палаталары "Қазақстанның үздік тауары" өңірлік көрме-конкурстарын ұйымдастырушылар (бұдан әрі – өңірлік конкурстарды ұйымдастырушылар) болып табылады. Конкурсты ұйымдастыру тиісті қаржы жылына республикалық бюджетте осы мақсаттарға көзделген қаражат есебінен және оның шегінде жүзеге асырылады. "Қазақстанның үздік тауары" өңірлік көрме-конкурстарды ұйымдастыру облыстардың, республикалық маңызы бар қаланың және астана әкімдіктерінің жергілікті бюджеттері қаражаттары есебінен және шегінде жүзеге асырылады.

## 2. Конкурстың негізгі мақсаттары:

- 1) жеке және заңды тұлғалардың отандық өнімнің сапасын арттыруға бағытталған қызметін жандандыру;
- 2) Қазақстан нарығын жоғары сапалы және бәсекеге қабілетті өніммен толықтыруға жәрдемдесу;
- 3) отандық және халықаралық стандарттар негізінде сапаны басқару мен қамтамасыз етудің заманауи әдістерін кеңінен енгізуге алғышарттар жасау және оған жәрдемдесу;
- 4) сапа проблемаларын шешу қажеттілігіне өнеркәсіптік, коммерциялық және қоғамдық ұйымдардың назарын аудару;
- 5) халық арасында сапа идеясын дәріптеу болып табылады.

## 3. Мыналар:

- 1) Қазақстан Республикасы аумағында өнеркәсіптік, азық-түлік тауарларын және өндірістік-техникалық мақсаттағы өнімдерді өндіруді жүзеге асыратын;
- 2) өнім сапасының тұрақты жоғары деңгейін және оны жүйелі түрде жақсартуды қамтамасыз ету жөнінде конкурсты ұйымдастырушы растаған оң нәтижелері бар дара кәсіпкер немесе заңды тұлға конкурсқа қатысушы бола алады.

4. Конкурсқа қатысуға ниет білдірген заңды тұлға немесе дара кәсіпкер Қазақстан Республикасының Үкіметі бекітетін "Қазақстанның үздік тауары" өңірлік және республикалық көрме-конкурстарына ұсынылатын материалдар мен өнімді ресімдеу, ұсыну және алдын ала сараптамалық бағалау ережелеріне сәйкес материалдарды ресімдейді және конкурсты ұйымдастырушыға береді.

## 5. Конкурс мынадай үш номинация бойынша жүргізіледі:

- 1) "Өндірістік мақсаттағы үздік тауарлар";
- 2) "Халық тұтынатын үздік тауарлар";
- 3) "Үздік азық-түлік тауарлары".

Әр номинацияда үш жеңімпаз айқындалады.

6. Конкурс Комиссия шешімімен бекітілетін іс-шаралар жоспарына сәйкес өткізіледі және төрт кезеңмен жүзеге асырылады:

- 1) бірінші кезеңде конкурсқа қатысуға өтініштер қабылдау, материалдар мен өнімдерді сараптамалық бағалау жүзеге асырылады және 9 жеңімпаз айқындалады;

Өңірлік конкурстарды ұйымдастырушылар конкурсты ұйымдастырушыға өңірлік конкурс жеңімпаздарының қажетті құжаттарын жібереді.

Өңірлік конкурстардың жеңімпаздары республикалық конкурсқа қатысады.

2) екінші кезеңде материалдар мен өнімдерді сараптамалық бағалау республикалық деңгейде жүзеге асырылады және үш номинация бойынша 27 финалист анықталады;

3) үшінші кезеңде 27 финалист онлайн дауыс беруге қатысады.

4) төртінші кезеңде конкурсты ұйымдастырушы алдын ала қорытындылары және онлайн дауыс беру нәтижелерімен бірге 27 финалстің материалдарын Комиссияның қарауына ұсынады (әр номинацияда үш финалистен).

Комиссия ұсынылған материалдар негізінде 9 конкурсқа қатысушыға "Қазақстанның үздік тауары" республикалық көрме-конкурсы дипломанты атағын беру туралы шешім қабылдайды (бұдан әрі – конкурс дипломанттары).

Алдын ала сараптаманың қорытындысы бойынша балдар тепе-тең түскен жағдайда, жеңімпаз онлайн дауыс беру арқылы анықталады.

7. Конкурс дипломанттары "Қазақстанның үздік тауары" республикалық көрме-конкурсының эмблемасы және дипломдарымен марапатталады.

8. Конкурс дипломанттарының тізімі бұқаралық ақпарат құралдарында жарияланады.

9. Конкурс дипломанттары конкурстың эмблемасын жарнамалық мақсатта төрт жыл бойы пайдалану құқығына ие болады.